

Tafsiira Suuratu Ar-Ruum-Kutaa 13

Description

Badiin Lafaa fi Galaana irratti Mul'atee

Yeroo amma akkuma beekkamu, lafaa fi galaana keessatti badiin (fasaanni) garmalee baay'ate jira. Sababni badii kanaa maali jedhamee yoo gaafatamee wanta harki namaa hojjateedha. Mee dhugaa kana aayah tana keessatti haa ilaallu:

ظَهَرَ الْفَسَادُ فِي الْبَرِّ وَالْبَحْرِ بِمَا كَسَبَتْ أَيْدِي النَّاسِ لِيُذْيِقَهُمْ
 بَعْضَ الَّذِي عَمِلُوا لَعَلَّهُمْ يَرْجِعُونَ

٤١

“Sababa harki namootaa hojjateen lafaa fi galaana keessatti fasaanni mul'ate. Kanaafu, akka isaan deebi'aniif [adabbii] wanta garii isaan hojjatanii isaan dhandhamsiisa.” Suuratu Ar-Ruum 30:41

Fasaanni jechuun haalli badaa ta'uudha. Fasaanni faallaa fooyya'iinsaati. “**Sababa harki namoota hojjateen**” jechuun sababa cubbuu, dilii fi badii namoonni hojjataniin lafaa fi galaana keessatti fasaanni mul'ate. Fasaanni kuni lafa keessatti roobni xiqqaachuu, hoongeen argamuu, dhibeen baay'achuu, qilleensi baramaan faalamu fi kkf. Galaana keessattis qurxumiileen du'uu fi kanneen biroo. [\[1\]](#)

Sababa namoonni cubbuu fi badii hojjataniin haalli jirenyaa isaanii badaa ta'a. Cubbuun hundarra guddaan shirkiidha.

“**Kanaafu, akka isaan deebi'aniif [adabbii] wanta garii isaan hojjatanii isaan dhandhamsiisa.**”

Kana jechuun ma'asiyaa irraa buqqa'anii gara Rabbii akka deebi'aniif adabbii hojji isaanii isaan dhandhamsiisa. Fkn, hoongen adabbii hojji isaanii. Sababa isaan cubbuu hojjataniin hoongee isaanitti buusa. Kanaafu, gara Rabbii deebi'anii akka jirenyi isaanii fooyoftuuf hoonge isaanitti buusa.

Faaydaa aayah tana irraa argatan keessaa:

Faayda tokkoffaa: sababni jirenyaa keessatti haalli namoota baduu (fasaadaa) hojji ilma namaati. Rabbiin olta'aanakkana waan jedheef: “**Sababa harki namootaa hojjateen**” Kanarratti dabalatee jechi Rabbi olta'aa ni agarsiisa:

وَلَوْاَنَّ أَهْلَ الْقُرَىٰ إِمْنُوا وَاتَّقُوا لَفَنْحَنَا عَلَيْهِمْ بَرَكَاتٍ مِّنَ
السَّمَاءِ وَالْأَرْضِ وَلَكِنَ كَذَّبُوا فَأَخْذَنَاهُمْ بِمَا كَانُوا

يَكْسِبُونَ ١٦

“Osso warri magaalootaa amananii fi Rabbiin sodaatanii, silaa samii fi dachii irraa barakaa isaan irratti bannaa turre. Garuu isaan ni kijibsiisan, kanaafu wanta hojjataa turaniif isaan qabne.”
Suuratu Al-A’araaf 7:96

Samii fi dachii irraa barakaa isaaniif banuun samii irraa rooba roobsuu fi dachii keessaa biqiltoota biqilchuudha. “**kanaafu wanta hojjataa turaniif isaan qabne.**” Sababa hojji badaa hojjataa turaniif adabbiin, balaa fi barakaa dhabamsiisuun isaan qabne.

Faayda 2ffaa: namoonni sababa malee akkanumatti hin adabaman. Rabbiin olta’aan waan akkana jedheef, “**sababa harki namootaa hojjateen.**” Kanarrraa faaydan biraan ni baha: namni adabbiin akka isarraa ka’u barbaade gara Rabbii haa deebi’u (haa tawbatu). *Tawbachuun sababoota adabbiit ittiin namarraa ka’uu fi mindaa ittiin argatan keessaa tokko.* Kanaafi Huud ummata isaatiin akkana jedhe:

وَيَقُومُ أَسْتَغْفِرُ رَبَّكُمْ ثُمَّ تُوبُوا إِلَيْهِ يُرْسِلِ السَّمَاءَ
عَلَيْكُمْ مَدْرَارًا وَيَزِدُّكُمْ قُوَّةً إِلَى قُوَّتِكُمْ وَلَا نَثُولُوا

محررين ٥٢

“Yaa Ummata kiyya! Gooftaa keessan araarama kadhaa, ergasii gara Isaatti tawbadhaa. Bokkaa walitti dhaabbataa godhee isiniif ergaa. Humna keessan irrattis humna isiniif dabala. Yakkamtoota taatanii irraa hin garagalinaa.” (Suuratu Huud 11:52)

Faayda 3ffaa-Tarii adabbiin gara Rabbiitti deebi’uuf sababa ta’uu danda’ a. “**akka isaan deebi’aniif**” waan jedheef.[\[2\]](#)

Namoonni cubbuu fi badii hojjachuu



Fasaanni lafaa fi galaana keessatti mul'achuu fi babal'achuu



Adabbii hojii isaanii isaan dhandhamsiisu



**Kaayyoon kana gochuu akka cubbuu (dili) irraa buqqa'anii
gara Rabbii deebi'aniif.**

Dachii Keessa Deemun Warra badan ilaalu fi barnoota irraa fudhachu

قُلْ سِيرُوا فِي الْأَرْضِ فَانظُرُوا كَيْفَ كَانَ عَاقِبَةُ الَّذِينَ مِنْ قَبْلِكُمْ كَانَ

أَكْثَرُهُمْ مُشْرِكُونَ




Jedhi, “Dachii keessa deematii xumurri warra duraanii akkam akka ture ilaala. Irra hedduun isaanii mushrikoota turan.” Suuratu Ar-Ruum 30:42

Kana jechuun, yaa nama gara haqaatti namoota waamu hoo! Mushrikootaanakkana jedhi, “dachii keessa deematii iddo jirenyaa namoota isiniin dura Rabbiiitti kafaranii fi Ergamtoota Isaa kijibsiisanii ilaala. Xumurri dhimma isaaniitii fi booddeen Ergamtoota Rabbii kijibsiisuu fi kufrii isaanii akkam turee? Adabbiin isaan hin balleessinee? Warra isaan booda dhufaniif barnoota hin goonee? “**Irra hedduun isaanii mushrikoota turan**” kana jechuun sababa irra hedduun isaanii Rabbiiin waliin waan biraa gabbaraa turaniif ni badan (dachii irraa ni duguuggaman).[\[3\]](#)

Dachii keessa deemuun takkaa qaaman ta'a takkaa immoo qalbiin ta'a. Qaaman dachii keessa deemu jechuun miilan deemuun iddo namoonni kunniin itti badan ilaalanii barnoota irraa fudhachuudha. Qalbiin deemuun immoo seenaa isaanii dubbisuun xumurri isaanii akkam akka ture itti xinxalluudha.[\[4\]](#)

“Irra hedduun isaanii mushrikoota turan” yommuu jedhu shirkii irraa akeekachiisa. Yaa namoota shirkii hojjattan! Akkuma ummata isiniin duraa shirkii hojjachuu yoo itti fuftan, xumurri keessanakkuma xumura isaanii ta’atii of eeggadhaa.

Guyyaan Qiyaamaa dhufuun Dura Amanti Qajeelaa (Islaama) sirritti qabadhu



“Guyyaan deebisaan isaaf hin jirre Rabbiin irraa dhufuun dura fuula kee amantii qajeelaaf qajeelchi. Guyyaa san addaan fooyamu.” Suuratu Ar-Ruum 30:43

Kana jechuun Guyyaan Qiyaamaa Rabbiin irraa dhufuun dura amanti qajeelaa gadi dhaabuuf qalbii keetiin itti garagalii, fuula keetin itti qajeeli, qaama keetin carraaqi, Kanaafu ajajoota fi dhoowwaa isaa ciminnaan hojii irra oolchi. Keessaan fi alaan dirqamoota isaa bakkaan gahi. Guyyaan deebisaan isaaf hin jirre Rabbiin irraa dhufuun dura yeroo, jirenyaa fi dargaggummaa kee saamadhu.

Amantiin qajeelaan kuni Islaama. Guyyaan deebisaan isaaf hin jirre immoo Guyyaa Qiyaamaati. Guyyaan kuni dhufnaan eenyullee isa deebisuu hin danda’u. Namoonni hojii gaggaarii lamuu irra deebi'anii akka hojjataniif carraan isaaniif hin kennamu. Kana irra, yeroon hojii xumuramee jira. Jazaa malee homtu hin hafne. **“Guyyaa san addaan fooyamu.”** Guyyaa san namoonni hojii isaanii irratti hundaa'e garee adda addaatti qoqqoodamu. Warri ibiddaa hojii isaanii irratti hundaa'e garee gareen gara ibiddaa oofamu. Warri Jannataas hojii isaanii irratti hundaa'e garee gareen gara Jannataa oofamu.[\[5\]](#)

Kitaabban wabii:

- [\[1\]](#) Tafsiir Muyassar-408, Tafsiir Tahriir wa tanwiir-21/110-111
- [\[2\]](#) Tafsiir Qur'aanil Kariim-Suuratu Ar-Ruum, fuula-257-259
- [\[3\]](#) Tafsiir Xabarii-18/514, Zaadul Masiir-1096
- [\[4\]](#) Tafsiir Qur'aanil Kariim-Suuratu Ar-Ruum, fuula-262
- [\[5\]](#) Tafsiir Sa'adi-755, Ma'aariju Tafakkuri wa daqaa'iqu tadabbur-15/171

Date Created

September 20, 2020

Author

admin